



**Uunga siunnersuut: Aatsitassat pillugit ingerlatallu tamatumunnga pingaarutillit pillugit Inatsisartut inatsisaata allanngortinneqarnera pillugu Inatsisartut inatsisaat nr. xx, xx. xxx 2018-imeersoq. (aatsitassanut ikummatissanullu inatsit) (Erngup nukinga pillugu Inatsisartut inatsisaata nutaap aamma kommunit aqunneqarnerat pillugu Inatsisartut inatsisaata nutaap malitsigisaannik sunniutaasunik allanngortitsinerit)**

(Aatsitassanut, Suliffeqarnermut, Nunamut Namminermut Nunanilu Avannarlerni Suleqatigiinnermut Naalakkersuisoq)

(Siullermeerneqarnera)

Demokraatiniit siunnersuut una ajunngitsutut isigaarput. Inatsisini paatsuuganartut ikinneruppata, ingerlatsinermilu allaffissorpeq minnerpaaffianiitikkutsigu, taava nunatsinnut pitsaanerpaassaaq. Aammattaaq pissusissamisoortutut isigaarput inatsit unatut ittoq allanngortipallanneqarsinnaasuuppat, taamaangippat amerlasuutigut nunatsinni ineriartornissaq pisariaqartitarput kinguarsarneqarsinnaammat, tamannalu pissusissamisoortutut isiginnginnatsigu oqaatigerusupparput.

Maannamut aatsitassarsiorluni suliassanut atatillugu erngup nukinganik atuinissamut akuersissummik pissarsinissamut, pisinnaatitsissummik pigisaqartup aatsitassanik peqarfeqarneranik takussutissaqartitsinera aammalu niuerneramik tunngaveqartumik piiarneqarsinnaasumik killissalersuisimanissaa, apeqqutaasimavoq. Piumasaqaat taanna naammassiniarlugu pisinnaatitsissummik pigisaqartup imminut akilersinnaassutsimik misissuilluni, suliassamut aningaaserivimmit aningaasalersuinissaq anguneqarsinnaasoq, uppersarsinnaasussaavaa. Ingerlatseqatigiiffiugaanni mikisoq imaluunniit suliffeeraangaanni suliampilu taamaattumik aallartitsiniarluni, taava kikkut tamarmik takusinnaareerpaat, ajornarluinnartussaasoq, erngup nukinganik nukissiorfiliornissaq annertoorujussuarnik sanaartornermut aningaasartuuteqarfiusarmat. Tamanna tunngavigalugu isumaqarpugut, aatsitassarsiornissamut atatillugu erngup nukinga atorlugu innaallagissiorfiliortoqarniartillugu pissusissamisuussasoq siunissami erngup nukinga pillugu aalajangersakkat tamarmik Inatsisartut inatsisaanni tassani ataatsimoortinneqarnissaat naleqquttusoq.

Neriuppugut allannguuteqartitsinikkut ilaatigut sullissinerup pisarnera pitsaanerulerumaartooq aammalu erngup nukinganut tunngatillugu suliniutit assigiinngitsut sukkanerusumik allartinneqarsinnaalerumaartut, tamanna Kalaallit Nunaanut aqutissaammat. Ullumikkut takusinnaavarput nukimmik pilersuinerup 73 %-ia mingutsitsinngitsuusoq, tamannalu nuannerpoq aamma neriuppugut siunissami suli annerulerumaartooq. Tassunga atatillugu Naalakkersuisut apererusuppakka 2030-mi Kalaallit Nunaata mingutsitsiffiunngilluinnarnissaanut Naalakkersuisut pilersaarutaat piviusorsiornersoq? Imaluunniit imminnut artukkerpallaalaarsimanginnerisut? Imaangilarli annertuunik kissaateqarneq ajormat.



Kissaatigiinnarparali takorluukkat pivusorsiortuunissaat anguneqarsinnaanissaallu. 2018-mi Kalaallit Nunaat mingutsitsinnginnerusoq ornipparput taamaakkaluartorli biilit mingutsitsinnginnerusut akitsuusersorniarneqarput misilinniarnagulu biilit qanganisarsuit nunatsinni avatangiisinik mingutsitsillutik aqqusinerni angallattut piarneqarnissaat - uanga isumaga naapertorlugu Kalaallit Nunaannut mingoqanngitsumut tamanna aqutissatut ilaagaluarpoq.

Taamatut oqaaseqarluta Demokraatini siunnersuut Inuutissarsiornermut Aatsitassanullu Ataatsimiititaliamut ingerlateqqipparput suliareqqitassanngorlugu.